

東

華

續

錄

東華續錄

咸豐八十二

臣王先謙敬編

臣陶潛宣恭校

八月癸卯朔 上御經筵○幸圓明園○頒 硃諭今歲秋仲朔  
舉行經筵之典四書論題凡爲天下國家有九經所以行之者一  
也南齋翰林所擬御論殊未發明奧旨爰親加改定以期驗諸力  
行也是日早在弘德殿理事恭讀案頭 高宗聖製經筵御論冊  
方知乾隆辛酉春亦用是題 大聖人貫始貫終至誠無間發乎  
文者皆傳心之要道也予小子豈能窺測萬一哉雖此次御論與  
聖製默相符合方惕思肯構之無遑又豈敢自詡哉因命侍郎  
沈兆霖恭錄成帙首書 聖製文次則朕之御論南齋原稟並附  
錄焉○諭軍機大臣等瑞麟等奏請復設水師以重海防並酌籌

增餉各摺片天津海口原設水師於道光元年六年先後將水師總兵及水師營裁撤見值海氛未靖自應亟籌復設以重防務本日已諭知黃宗漢慶端等於閩廣兩省抽調大號戰船艇船各二隻備齊器械派員管帶來津以備操演其瑞麟請設水師二千名與馬步官兵共成三千名除將原額抵補外共添兵一千三百餘名及添蓋兵房等事均著照議辦理惟直隸提督移至大沽海口一節從前立法酌量通省形勢安設提鎮以資彈壓自有深意今專爲防海起見於形勢有無窒礙著僧格林沁會同慶祺籌酌或將天津鎮總兵加提督銜准其專摺奏事而提督仍駐古北口以符舊制著妥議具奏至添設水師以後每年增餉十餘萬兩見在添建兵房營署及置備器械等項復需銀十餘萬兩據瑞麟奏請將長蘆鹽引每斤減價制錢二文除京引照常減價外餘擬仍復

舊價並將緝私巡費復歸官辦及閩廣商船准其在大直沽地方起剝每年捐交剝價錢數萬串並勸辦抽釐等事均爲協濟餉需起見既稱商情悅服自可無礙施行並著酌定章程具奏將此諭令知之○諭瑞麟奏籌辦海防善後請於閩廣抽調戰艦各船一摺天津見籌復設水師以備不虞所需添調各船自應及早籌備著慶端瑞璜黃宗漢畢承昭於各該省抽調大號戰船艇船各二隻配帶礮械酌派熟諳海洋將弁各二員精健水兵各四十名管駕迅速赴津以資調遣將此由五百里各諭令知之○戶部奏清查五字完欠帳目分別催追得旨依議辦理雖未能徹底根究但可作此完局尙屬可行若必逐款清查該五字私帳徒興大獄無裨大局惟以後豫籌民鋪防制之法務須慎益加慎不可爲後人作俑他日艱於補救也○平浙江陣亡從九品戴大川等祭葬世

職○甲辰諭內閣慶端奏官軍聯丁連日克復二縣城池一摺福建松溪政和二縣被逆竄踞六月二十八九等日候選知府陳維漢等激勵兵勇進攻松溪該逆出城抵禦均被擊敗兵勇四面圍攻登陴進城斃賊三百餘名賊勢窮蹙向東門逃逸我軍窮追十餘里復殺賊四百餘人當將縣城克復又二十六七等日遊擊袁良政和縣知縣楊國榮督率兵勇攻勦政和逆匪設伏誘賊引至山後各軍一齊殺出該逆潰亂退入城中我軍乘勝進攻燒毀賊營十餘座政和縣城亦於七月初一日克復勦辦尙屬得手著卽督飭文武乘勝追捕毋畱餘孽所有此次打仗出力員弁兵勇聯甲人等准該署督擇尤請獎毋許冒濫○勝保奏逆首李侍賢陳玉城等突竄廬城店埠梁園相繼告陷擒匪在北粵逆在南中間僅隔定遠一城而壽六亦極喫重臣以一軍橫截其中已屬腹背

受敵設有疏虞其患不可勝言見已於懷遠各營抽撥兵勇三千餘名分布鳳陽之殷家澗一帶以杜句結而扼北竄兼爲定遠後路聲援並飛飭穆騰阿率領馬隊會合皖軍由定遠迎擊臣亦馳赴鳳南一帶相機策應其懷遠攻勦事宜暫時責成徐廣縉率同署總兵龍澤厚等輪流進攻復飛咨袁甲三督軍節節進勦札飭德楞額等由鹿邑一帶隨時探明迎擊 上諭軍機大臣等勝保奏店埠梁園相繼失陷定遠危急並翁同書奏兵勇潰散情形及飭潰勇歸隊各摺片覽奏實深憤懣髮捻各逆紛擾皖北自廬州失陷南路粵匪與鳳懷捻匪相去愈近惟恃定遠一城爲之間隔設再有疏虞則賊勢蔓延何堪設想勝保經朕授爲欽差大臣專辦皖省軍務翁同書身任巡撫見派幫辦均屬責無旁貸勝保自聞梁園失陷已於懷遠各營撥兵三千餘名分布殷家澗等處以

杜該匪等南北句結兼爲定遠後路聲援並飭穆騰阿率領馬隊由定遠迎擊懷遠攻勦事宜暫令徐廣縉督同龍澤厚等輪流進攻不使坐失機會其東西兩路復飛咨袁甲三等隨時偵探賊情設法進逼所籌均尙周密惟賊勢鴟張非速將廬州克復恐難遏其北竄此時勝保已移營鳳南一帶著卽督飭將士實力進勦與翁同書和衷共濟將失陷地方速圖克復翁同書所請餉需已諭令和春何桂清德興阿於江南江北糧臺各撥銀二三萬兩卽日解往接濟其所請調鄭魁士赴皖之處亦已諭令和春斟酌調派矣至李孟羣潰勇已由翁同書督令赴六安歸隊軍中法令宜嚴非獨潰勇無可姑息卽將弁中有畏葸不前致誤事機者亦當執法從事庶使稍知儆懼該撫旣知皖省兵將疲玩積習務宜力圖振作毋負委任李孟羣逃往六安置廬州於不顧卽治以軍法亦

不爲過姑念其平日尙屬勇往業經革職畱營著勝保翁同書調遣如有玩誤卽著嚴參治罪至此次店埠梁園相繼失守其帶兵各員有無臨陣退縮情事並著勝保等查明參奏將此由六百里各諭令知之○諭本日據勝保翁同書馳奏皖省自廬州失守後店埠梁園相繼報陷定遠危急糧臺罄洗雖前經部撥餉銀恐一時未能卽到著和春何桂清德興阿於江南北糧臺項下先行就近各籌撥銀數萬兩派員迅速解交翁同書軍營以資接濟毋稍遲誤至皖省見少帶兵大員鄭魁士本係壽春鎮總兵自調任江南後見在紫金山帶兵防鞫如該處情形不至十分喫緊或另有接替之人卽著和春飭令鄭魁士酌帶兵勇馳回皖省一面由驛具奏將此由六百里諭令知之○乙巳諭軍機大臣等前因袁甲三軍營需餉諭令崇恩等籌撥接濟本日據袁甲三奏稱自奉撥

以後山西山東稱有批解之款尙未收到河南則未聞報解該軍營所收徐屬錢糧及釐捐等項不敷放款十分之二必須山東等省按月如數撥解方可支持等語徐宿等處匪勢甚熾袁甲三督兵勦辦所稱需餉急迫均屬實情山東河南兩省與徐宿壤地毗連自應就近協濟著崇恩瑛榮遵照前旨將奉撥餉銀速行撥解卽不能按月籌措總須源源接濟毋任餉缺兵飢致賊匪愈形延蔓山西省奉撥之款較多惟該營需餉孔亟不能不量爲協撥著恆福於業經批解外仍設法籌撥陸續解往將此由五百里各諭令知之○李清鳳以病免以黃贊湯爲刑部右侍郎由通政使遷○丙午諭軍機大臣等德興阿奏撥解餉銀軍械接濟皖軍請催撥馬隊速赴浦口助勦並李兆受投誠尙未可信各等語前因廬州失陷諭令江南北糧臺各撥餉銀解往茲據德興阿奏稱已飭楊能

格籌解餉銀協濟並撥軍械以備應用所請調撥馬隊因馬匹短少不能多撥已據僧格林沁奏稱抽調吉林馬隊二百五十名派佐領博勒合圖統帶於八月初一日啟程又調直隸提標馬隊官兵二百名亦卽行南下此項馬隊共四百五十名自可陸續到浦至李兆受投誠一節當勝保奏到時朕卽以滁州城內尙有楊逆踞守何以於李兆受往來大營密請投誠毫無知覺恐其尙懷詭詐諭令勝保嚴密防維不可大意此時李兆受既仍在烏衣等處督戰又移文來安縣營自稱必不騷擾一到卽回似欲懈我軍心其投誠尙不可信著德興阿鞠殿華嚴諭該處文武員弁如滁全匪眾果敢前來撲擾卽當認真勦擊毋爲所惑致中其奸計至該匪等欲由水口窺伺六合情形喫緊著德興阿等督飭將士實力堵截毋任滁和逆匪得與南路句通是爲至要將此由六百里諭

令知之○丁未諭軍機大臣等前因貴州需餉孔亟當諭四川山西陝西各籌銀五萬兩湖南籌銀三萬兩分起解往以濟急需茲據蔣蔚遠奏軍務喫緊請飭催各該省撥款解黔等語粵匪竄入黔境黎平告急各路軍務亦形緊迫必得添募練丁接濟餉糈以顧全黔大局著王慶雲恆福曾望顏仍遵前旨各籌銀五萬兩迅速撥解並著駱秉章仍速籌銀三萬兩徑解黎平等處以資防剿毋誤事機將此由六百里各諭令知之○庚戌諭內閣監臨景廉等奏參承辦鄉試試卷遲延並御史徵麟等奏名冊又有舛錯各一摺順天府治中蔣大鏞糧馬通判蕭鼎禧承辦鄉試試卷已屬遲延名冊復有舛錯實屬玩誤均著交部議處○諭全慶廉兆綸奏遵查剝船經紀賠累成數意見不同各一摺向來由津承運到通虧短米石於道光二十八年五月間疊奉 諭旨剝船起卸米

石如稍有折耗卽照前案責令經紀剝船各半分賠剝船如有使水虧短等弊係由經紀拏獲卽著剝船獨賠與經紀無涉一船了一船之案其餘各船仍照舊章責令經紀船戶各半分賠等因

聖訓煌煌立法極爲平允自應永遠欽遵倉場侍郎崇綸李誦於本年二月開奏請改定新章殊屬非是嗣後著仍照舊章妥辦以歸畫一而免紛更至見在通州驗收米石已有十分之七前二十起應賠銀米著仍照新章分別追繳自此次奉旨之日爲始卽改歸舊例覈辦其見在承運經紀查明尙無通同舞弊情事至船戶所供經紀斛手人等有需索錢文等事著將船戶解送刑部如訊有經紀舞弊無論在津在通一併指名咨提嚴訊懲辦○諭軍機大臣等翁同書奏餉道將絕危急情形一摺廬城全椒之賊欲向張橋掠糧雖已退回梁園而土匪竄起深慮與逆賊相應且

定遠遙對清流關東通滁城北達臨淮西南通廬郡有四面受敵之勢若餉道被斷外無援師大局不堪設想勝保已移營鳳南一帶著卽統領各軍迅速前進與翁同書妥籌堵剿毋令定遠再有疏虞見在翁同書兵餉旣斷又無軍械何能進兵卻敵本日據何桂清奏酌撥軍餉由德興阿撥兵護送未知何日解到並知照勝保就近通融辦理至李兆受納款投誠前據勝保奏到朕卽疑滁州城內有僞國宗楊逆盤踞何以李兆受出城迎降及委員出入城中楊逆竟若罔聞其中恐有詭計昨聞滁賊有占踞烏衣擾及東西葛及由水口圖窺六合之信並聞李兆受親在烏衣等處督戰旣有投誠之言復有抗拒之事是其居心叵測欲令官兵漫無設備墮其詭謀勝保久歷行間或有成算然仍宜密加防範未可深信不疑致有意外之患將此由六百里加緊各諭令知之○諭

李定太奏擊退浦城竄匪援勦玉山等處獲勝並片奏玉山解圍各情形此次浦城匪徒竄入江山念八都卽經升用副將陶茂森分路進勦收復各隘江山龍泉兩路援師亦經該總兵分飭前進江常開三邑派撥兵勇協同堵勦布置均屬周妥玉山見已解圍竄逃各匪卽著飭令副將朱承先等由婺源德興跟蹤追勦以杜該逆分竄之路援閩之師既經副將張騰蛟總兵周天培饒廷選等兩面進紮直搗浦城諒不難卽日殄除江常各處回竄堪虞該總兵仍應駐紮該處策應諸軍以固浙省門戶毋庸親往浦城反致疏於防範其婺源一路仍咨會張芾一體嚴防毋令分擾爲要將此由六百里諭令知之○何桂清奏英人本欲起碇回國經臣發給照會告以欽差業經起程始肯在上海靜候其米佛二國人仍欲暫赴香港本月初旬卽須起碇又經辭煥與之再三要約已

據稱應允八月內准回上海請飭催欵差兼程赴蘇 上命桂良

等兼程前進○命李菡開缺以侍郎候補調廉兆綸爲倉場侍郎

劉崐爲戶部右侍郎以宋晉爲工部右侍郎

由內閣學士遷

○辛亥諭內

閣有鳳王慶雲奏匪徒滋事反獄勦捕完竣並請將該管大員及出力各員分別參保一摺四川會理州匪徒羅升等因私售廠銅被官罰賠輒敢糾約多人結盟搶掠拒捕官兵經署甯遠府知府祥慶建昌中營遊擊德茂帶兵往勦節次獲勝陣斬匪首餘黨悉數殲擒其在監之犯猶復起意脫逃拒傷兵役實屬罪大惡極見經按名拏獲依律斬梟正法地方一律肅清辦理尙爲妥協署會理州知州彭明縣知縣王錫之於私售廠銅之案違例科罰致肇釁端著交部嚴加議處署會理州營參將懷遠營都司花連布當匪徒句結之初黨與無多不能卽時撲滅著以守備降補以示懲

做其勦辦此案出力員弁准其擇尤酌保數員毋許冒濫○癸丑  
諭內閣順天府府丞蔣達奏因病出闕自請嚴議並參府尹委官  
護庇抗違各情覽奏實堪詫異府尹提調鄉閭是其專責如果委  
員人等呼應不靈自當與監臨和衷商榷實力整頓卽意見不合  
亦何妨專摺具奏乃竟自稱患病負氣出闕實屬謬妄糊塗蔣達  
著交部嚴加議處順天府府丞著毛昶熙暫行署理接辦鄉試提  
調事務內場監試御史著改派李培祐去其李培祐巡察甄門差  
使著都察院堂官酌派一員接辦至蔣達奏參梁同新護庇屬員  
及治中蔣大鏞辦理草率通判蕭鼎禧並不照例入場使其同黨  
盤踞兩所營私肥己大興宛平兩縣知縣偷減供給各委員等遇  
事疲玩各情與監臨景廉副都統載鶯監試志文等所奏亦大致  
相同著派瑞常會同載鶯寶璽逐款查明據實參奏梁同新於鄉

關要務不知認真辦理任用非人以致諸事廢弛有心徇庇著先行交部議處景廉於順天所屬各員並非統轄惟既充監臨亦難辭咎並著交部議處○諭前因張芾奏參周天受等遷延袒護各款當諭令和春何桂清查辦茲據查明覆奏除總兵周天受業經賞遣提督銜遊擊楊國正已革職擊問外所有浙江提標前營遊擊田應科平陽右營都司蕭傳科於派委開化馬金街防堵遇賊衝潰僅予摘去頂帶不足示懲田應科蕭傳科均著革職畱營效力以肅軍律○諭軍機大臣等袁甲三奏賊匪圖竄北路請添兵助剿等語據稱懷遠等處賊匪大半回竄盤踞濉溪口一帶意圖北竄勝保全軍見須南援廬州北路步隊僅止五千馬隊亦止百餘而賊眾至三四萬賊馬至二三千匹之多請於湖北畱防各兵或都興阿李續賓兩軍分撥馬步四五千入北來助剿此時徐宿

一路賊眾兵單設有疏虞則該逆長驅北犯所關非淺官文卽行酌量情形能否於防兵內分撥若干派員管帶馳往袁甲三軍營協同勦辦至李績賓一軍前令由舒桐一路赴援廬州原爲南北夾攻起見今逆匪大股回竄北路藩籬尤爲喫重能否分撥馬步隊以一軍繞道北上一軍仍攻南路並著官文酌度調派務宜南北兼籌先其所急毋誤事機將此由六百里諭令知之○諭本日據袁甲三奏賊圖北犯官軍先勝後挫請調各兵應援並庚長奏擬派傅振邦赴浮山堵勦瑛榮奏請由皖省接辦勝保糧臺各摺片此次捻匪糾約各路賊援傾巢出撲經副都統伊興額於鐵佛寺等處極力堵勦先勝後挫退守蕭縣自因眾寡不敵非由該副都統畏憚所致著照袁甲三所請免其懲處惟賊眾聚至數萬濫溪口營盤復爲賊踞北路情形萬分喫緊袁甲三見已將陝西兵

撥交伊興額調遣著卽飭令該副都統相機堵截務須痛加勦洗嚴遏北竄勿任再有延蔓庚長所請派令傅振邦馳赴浮山合勦該處係通清江要路惟距徐州較遠傅振邦能否帶兵前往駐紮著袁甲三斟酌情形妥爲調度並知照庚長可也至袁甲三請調馬隊官兵吉林等處馬隊未便再撥前撥綏遠城馬隊五百名往勝保軍營見在勝保專辦南路軍務據袁甲三奏淮南田塍交錯馬隊難於施展此項馬隊自可分赴北路以期得力其如何分撥之處卽著勝保袁甲三會同商辦務以布置得宜先其所急爲要至瑛榮所稱勝保行營糧臺請由皖省派員接辦其餉項仍由豫省協濟等語此時勝保軍營雖距豫省較遠而糧餉仍由豫省協濟是否必須另派承辦之員著勝保翁同書酌量情形咨照瑛榮知悉至見在勝保雖已與翁同書謀面而仍卽回去相距尙在百

里之外袁甲三爲徐賊牽掣一時未能赴鳳陽懷遠等處恐南北  
兩路未能兼顧甚爲可慮前命勝保袁甲三遴選武職大員幫同  
袁甲三統兵勦捕尙未據奏擬派何人著卽商定具奏俾北路勦  
匪事宜得有把握勝保卽可前往南路與翁同書援勦廬州漸圖  
進取毋得日久遷延致負委任將此由六百里諭令知之○諭袁  
甲三奏請調蘭山勦匪原起官兵回徐協勦等語山東蘭山匪徒  
滋事曾由徐州調派曹克兩鎮官兵由署副將郝上庠管帶前往  
勦捕甚爲得力見在伊興額先勝後敗退守蕭縣據探大股匪徒  
均在岳家集聲言卽日由臨渙至灰古堆渡河恐其直犯宿城張  
逆亦仍在彼盤踞是北路甚爲喫重而東匪業已肅清亟應移緩  
就急派兵出境兼以自固藩籬著崇恩卽將蘭山勦匪原起官兵  
派赴徐州交袁甲三調遣藉資堵勦一俟徐州情形稍鬆卽可酌

量撤回將此由五百里諭令知之○諭翁同書奏請飭催山西陝西按期撥解餉銀等語山西陝西二省協撥安徽軍餉向係每月各二萬兩茲據該撫奏稱七月中陝西並未報解山西僅解一萬二千兩皖省自廬州失守之後糧臺一空軍情萬分喫緊著恆福曾望顏仍各按月籌撥銀二萬兩派委妥員如期解赴翁同書軍營以應急需將此由五百里各諭令知之○和春奏金陵窮寇外撲勦辦獲勝得旨見在逆援未絕尤應嚴防旁竄能不使其逸出再分勦援賊自不難掃穴擒渠矣○幫辦軍務安徽巡撫翁同書奏逆匪注意定遠見在勦行團練防護分堵情形得旨鄉團非募勇可比以助官軍之威恐其臨時一潰受累不淺總應飭團勇居前以禦官兵接應鈔襲以壯其膽庶有把握朕看汝大敗之後布置或有未周殊爲可慮○署河南巡撫瑛瑩奏湖北棗陽土匪竄

入豫境撥兵勦辦得旨不准專顧豫境以鄰爲壑迅卽出境迎擊  
趕緊撲滅勿使嘯聚愈多勦辦愈難○予安徽陣亡參將胡會龍  
等祭葬世職○乙卯諭軍機大臣等翁同書奏賊撲藕塘馬隊失  
利池河及定遠縣城危急一摺賊偏定遠當卽諭令勝保統領各  
軍迅速前進妥籌堵勦見在賊眾數萬由界牌直撲藕塘穆騰阿  
帶領馬隊迎擊已獲勝仗卒因眾寡不敵失利退卻該大臣曾於  
初四日派馬步八百餘名接應何以復行折回僅留馬隊百餘名  
亦折回紅心驛所寄翁同書函信云初五日必到定遠復竟日不  
到何以遷延若此粵匪與捻匪意在句結一氣見在愈近惟恃定  
遠一城爲之間隔設有疏虞則賊勢益張勦辦更形棘手勝保見  
爲欽差大臣勦辦皖匪是其專責旣距翁同書軍營僅四五十里  
著卽督率各軍馳往截勦毋得再事延誤致干咎戾李孟羣係革

職留營之員應責令簡練兵勇由六安進援定遠冀可稍贖前愆  
翁同書仍督同見有兵勇實力防勦其池河以北明光鎮爲餉道  
文報要路關繫尤重著勝保翁同書迅籌布置遏賊北竄毋許疏  
懈將此由六百里加緊各諭令知之○以克復廣西慶遠府城道  
員蔣益澧以按察使簡用餘升敘有差○追贈廣西梧州殉難學  
政沈炳垣內閣學士兼禮部侍郎銜子祭葬世職謚文節並予知  
州蕭煊等祭葬世職○丙辰諭軍機大臣等昨因翁同書奏賊撲  
藕塘馬隊失利諭令勝保親率各軍馳往截勦俟布置北路妥協  
再赴廬州等語見在賊踞藕塘定遠萬分危急該大臣所派官兵  
何以甫至輒回翁同書所帶兵勇挫敗之餘軍火器械一切不全  
定遠若失卽勝保一軍亦有兩面受敵之勢自應先其所急該大  
臣卽未能移營前進亦應派得力援兵前往協勦毋許延誤見在

鳳懷賊匪屢經受創其勢漸衰著袁甲三迅速前進接辦鳳懷剿匪事務以便勝保交卸起程其徐州剿捻事宜應否交伊興額統率之處卽由袁甲三酌量辦理將此由六百里各諭令知之○諭和春晏端書奏周天受援師克復浦城一摺閩省松溪政和等處見無賊蹤周天受一軍又經克復浦城自應確探所往繞出賊前遏其深入閩中之路惟玉山敗匪前已竄往德興婺源近又退至七都球取道華埠撲我營盤李定太業已親赴常山督剿著胡興仁卽飭該總兵於常開一帶迅殄逆氛其遂安壽昌各路亦應堵其窺伺並知照張芾飭令徽防文武嚴密防剿毋許竄入周天受亦須兼顧浙江至崇安之賊竄出岑陽關見在鉛山河口處處戒嚴石逆又有竄往建甯爲回竄撫建之計是江西軍情亦形喫重曾國藩已於七月二十一日行抵江西省城其前部蕭啟江之兵

已至廣信著耆齡飛咨曾國藩飭令該道亟籌堵剿該侍郎迅卽前進探明賊勢趨向何處卽速往應援是爲至要將此由六百里各諭令知之○諭勝保奏皖省軍情緊要請飭撥四川湖南官兵等語安徽自廬州再失後店埠梁園等處相繼告陷定遠危急該處勇多兵少亟應裁勇添兵以資得力四川湖南兩省兵力素健著王慶雲駱秉章悉心籌畫如存營兵力尙敷調遣卽著各挑選精銳一千五百名配帶軍裝糧餉撥赴鳳陽一帶交勝保翁同龢調遣卽使該省兵力不敷亦應酌量調撥勿得稍存膜視將此由六百里各諭令知之○諭勝保奏皖省軍情喫緊必須添兵勦辦請飭河南省將陝兵一千名並原防鹿邑之馬隊二百餘名撥往助剿等語見在皖省懷鳳各處賊勢蔓延定遠又甚危急勝保督兵兼顧不敷分撥鄰省自當協助兵力惟前據瑛棨奏陝西官兵

業已抽調六百名赴袁甲三軍營所存僅四百名著該撫卽將此項官兵調赴勝保軍營以資攻剿至豫省防務不甚緊要著於南北兩鎮中酌量抽調以補陝兵之數其原防鹿邑之營總蘇克金所帶馬隊二百餘名著一併飭赴勝保軍營卽由京新調之馬隊官兵內截留二百名防堵鹿邑如此量爲轉移先其所急庶無顧此失彼之虞將此由六百里諭令知之○勝保奏李兆受未經出降之先已將粵匪擬撲廬州暗通消息至僞國宗楊逆本爲李兆受所制當其出城迎降之際已計遣該逆前赴全椒有在城僞檢點稍知風聲當卽藉端殺死滅口迨廬州失事粵逆僞後軍主將李秀城屢調令攻撲來安江浦李兆受以桐廬眷屬未盡來滁心腹陳廣峻等尙在金陵城池未經出獻卽僞令不能不佯爲奉行因先期知會來安縣知縣敘明並不滋擾而後派人僅至水口經

官兵擒斬多名李兆受即以官兵得勝不能前進解釋粵逆之疑乃李秀城復遣李毛薙髮於草履中暗藏偽文送往鳳懷糾合張龔二逆暨張澂等匪率黨齊至大柳地方與粵匪會合同犯來安盱眙六合江浦以襲江北大營後路而解金陵之困又經李兆受遣人將李毛邀殺搜得偽文稟送慶瑞行營呈驗又先後令其叔李銜華兄李昭雲赴臣營面稟備述粵逆實在攻撲定遠繞犯大柳以圖東竄李兆受俟眷屬到齊陳廣峻等招出即獻城舉事臣屬李銜華等轉催其作速薙髮以明心迹惟粵逆既有竄撲定遠窺伺東路之說不可不加意嚴防已飛咨德興阿轉飭江北各營豫備堵剿並札飭塔思哈緊守關山營盤一面派穆騰阿酌帶馬隊埋伏藕塘一帶以備邀擊復令知縣田玉梅帶領勇丁千餘名由紅心驛馳赴大柳相機應援其定遠前路已由臣與翁同書派

隊分布紮營實力扼截報聞○以畢道遠爲內閣學士

由翰林院侍讀學士

○丁巳諭軍機大臣等前因廬州失守諭令官文知照李續賓

都興阿等分兵赴援本日據官文奏通籌大局兵力難分一摺擬俟太湖攻克乘勢掃蕩舒桐再行趨赴廬州會圖克復並俟吉安得手後撤回劉騰鶴一軍代防湖口彭澤然後調雷防各兵併交李續賓統帶始能分兵沿江以會楊載福之師復因都興阿馬隊不及千名方議由宿松進剿遽難抽調所籌雖係實在情形俱恐緩不濟急見在店埠梁園藕塘一帶均爲賊踞定遠縣城萬分危急翁同書挫敗之餘軍械全失卽勝保拔營前進仍慮兵力較單恐難遏賊北竄該大臣旣稱應援淮北如兵力不敷擬由楚省另行籌募於勦匪機宜堪資補救著卽早爲籌募並撥本省營兵共合二三千名卽派得力大員統領徑赴廬州定遠等處以爲勝保

等策應並帶軍火器械酌帶糧臺前往著官文卽行妥籌辦理仍飭李績賓迅克太湖卽未能迅克舒桐儻能與勝保等謀面會商兩路夾攻更爲得力李績賓一軍係官文派出原不必歸勝保調遣而旣經會同協勦仍當不分畛域都興阿一軍尙在宿松能否兼顧北路著官文酌量調度此時鳳陽定遠等處賊眾兵單若但攻南路恐驅賊北竄勝保袁甲三力難抵禦該大臣務當統籌大局使皖省危急情形早爲轉機是爲至要將此由六百里諭令知之○戊午諭內閣前因官文奏湖北紳民於捐餉外自備口糧團練防勦懇請再行加廣文武鄉試中額當交該部速議具奏茲據禮兵二部會奏該省捐助軍餉業經准加鄉試定額三名此次所請因募勇防勦再行加廣中額之處銀數旣無可稽額數何從覈定所有該省紳民應如何酌予獎勵以昭激勸著該督秉公酌覈

另議辦理○己未諭內閣慶端奏官軍攻勦克復甯化縣城一摺

福建甯化縣城被賊占踞前代理汀州府知府雷瑞光等分三路進攻賊眾嬰城死守代理甯化縣知縣劉潤田挑選壯勇假稱匪黨前往援應賺開南門雷瑞光亦即督同文武員弁由下東等門攻入賊匪被殲無算於七月初六日將縣城收復所有在事出力及被害官兵等著慶端查明分別奏請獎卹該匪見竄中沙等處並著飭令各該地方文武實力防勦毋任延蔓○諭軍機大臣等袁甲三奏擒匪擾竄豐縣擬即往北路督勦一摺該匪由濰溪口合股竄突先撲蕭縣旋復窺伺徐州經兵勇擊退又西撲豐縣竄入縣城其奔突情形實爲劇疾豐縣與山東接壤若徒事尾追恐該逆四路蔓延轉致驅之北竄傳振邦已先抵蕭縣即可由東面進勦袁甲三既擬親往督勦著即督飭北路各屬實力堵扼總須

遏賊北面之衝勿令闖入東境方不至成巨患副都統伊興額向  
來剿匪尙能勇往何以退守蕭縣之後坐視捻匪狂竄不堵不追  
致令豐縣失陷實屬遷延貽誤著革職暫畱軍營帶罪自效所有  
迷失步隊卽飭傅振邦重加整頓並連馬隊均歸統帶以資攻剿  
至袁甲三馳赴豐沛其淮南剿匪各軍鞭長莫及准其暫交徐廣  
縉統馭相機攻克懷遠以分賊勢俟豐沛一路匪蹤稍遠袁甲三  
仍當折回鳳臨以資統率另片奏山東曹克兩鎮官兵請均歸調  
遣等語山東防兵爲北路屏蔽勢難遠出見當事機緊急亦當不  
分畛域以勦爲防著袁甲三酌量情形如有應調該二鎮官兵之  
處卽一面札調一面知照崇恩不必俟商議定妥致延時日至所  
調之兵止可於山東江南交界地方兜圍合剿不可調往遠處致  
令本省空虛勝保駐軍懷定之間自應速援南路而北路賊蹤分

擾袁甲三又不能卽赴鳳臨若專交徐廣緝勦辦恐未可恃前諭令會保武職幫辦大員仍著妥商速奏俾得分投勦辦各專責成方不至彼此牽制坐失事機也將此由六百里各諭令知之○諭本日據袁甲三奏捻匪竄擾豐縣請飭將山東省曹兗各鎮兵悉歸調遣一摺豐縣接壤山東見被賊竄東省應力加防堵著崇恩酌派官兵相機布置毋使該匪闖入東境至徐宿官兵尙嫌單弱袁甲三請調山東附近之兵合力兜拏著崇恩卽行飭知曹兗各鎮將弁一經袁甲三行文調取卽須迅速赴調不必候本省飭知有需時日致誤事機至所調之兵亦經諭知袁甲三總於東省邊境處所協同兜擊以勦爲防彼此均得兼顧斷不至將東省之兵調往遠處反致本省空虛也將此由六百里諭令知之○庚申諭內閣吏部奏遵議鄉闈提調監臨處分一摺順天府府丞蔣達提

調鄉闈擅自出場著照部議卽行革職監臨景廉著照部議降一級畱任准其抵銷順天府尹梁同新應得處分著俟瑞常等查明具奏時再降諭旨○諭軍機大臣等僧格林沁奏趕築礮臺情形請派督臣會同辦理一摺雙港礮臺營壘據稱卽可竣工其大沽海口礮臺地盤業已打起惟急需木料應用而商人居奇杉木殊不易得該大臣等請派督臣會辦自爲呼應較靈起見所有天津修築礮臺等事宜卽著慶祺會同僧格林沁瑞麟辦理時序已屆秋分轉瞬卽交冬令各項要工均應趕緊修築並著僧格林沁等實力督催毋稍遲誤將此諭令知之○諭羅惇衍奏裁併壯勇以節經費一摺所籌俱是見在夷人仍踞省城既不與官紳爲難亦止可暫與相安但使有所顧忌自不至四出肆擾至東路練勇旣因經費不敷而西北兩江又無須移撥自應酌量裁併以節虛

康該侍郎等於布置停妥後卽分赴各屬督催捐項其畱勇地方仍當妥爲彈壓固不可令其尋仇啟釁亦不可因督率無人漸生懈弛俟省城局面稍定再行斟酌辦理其已繳捐項各紳民著准其卽行奏獎收支數目仍著先將大概總數查明報部以備覈銷

○辛酉諭軍機大臣等前據僧格林沁遵派吉林馬隊二百五十名直隸提標兵二百名赴德興阿軍營均已先後啟程南下本日據崇恩奏捻首蘇添幅率領大股攻陷豐縣闖入山東單縣被圍緊急金鄉魚臺賊蹤徧地勢甚猖獗東省爲北路藩籬非厚集兵力恐難抵禦所有前調往北路之官兵四百五十名見有都司韓文蘭等帶兵五十名在京領馬尙未啟程所有前站官兵諒尙在山東境內著僧格林沁托明阿飛咨飭令該帶兵官就近截畱山東交巡撫崇恩調遣見復諭知袁甲三將山東派赴徐州兵一千

餘名均交史榮椿統帶回至東省會勦俟該提督到山東後前項截留官兵卽併歸統帶其領解備用餘馬已諭崇恩派員先行解赴浦口矣天津見存官兵數不甚多夷務尙未大定未便調出著慶祺托明阿於直隸各鎮協內挑選精銳官兵一千名或千數百名交新授太原鎮總兵田在田統帶卽行馳赴山東協同史榮椿勦辦田在田卽著毋庸來京陛見本日慶祺奏元城縣有匪徒聚眾劫官一案大名鎮兵自應留資彈壓毋庸調出此等匪徒雖不過爲抗糧滋事而當鄰近賊蹤逼近尤宜及早查辦以免釀成巨患著慶祺責成該道聯捷將兇犯迅速捕拏毋任漏網將此由五百里諭令知之○諭勝保等奏糧臺餉需請仍由豫籌解並所撥官兵餉項他省不得截留等語前因瑛榮奏勝保行營糧臺請由皖省接辦當經諭令勝保等斟酌情形咨照瑛榮辦理茲據勝保

等奏稱皖省殘破之餘庫藏罄洗奉撥餉銀均未解到請飭河南  
省照舊籌撥以免萬餘兵勇懸釜待炊所奏均屬實情所有勝保  
糧臺餉需著仍由河南軍需局照舊籌撥俟兩三月後各省餉項  
解到定有章程再由皖省接辦卽著勝保將見奉諭旨咨明瑛棨  
遵辦至各路調撥兵勇均屬迫於待用而軍情旦夕不同亦不免  
有已奉諭旨復行改調之處勝保所請飭下各路統兵大員遇有  
該營請調官兵均不准擅行截留在該大臣專辦一路故有此請  
而全局情形則不能無移緩就急未可稍存拘泥也所有懷鳳臨  
各路兵勇該大臣既請加徐廣縉鄉銜暫畱統帶遇有緩急仍須  
隨時策應勿致南下以後北路轉有疏虞是爲至要將此由六百  
里諭令知之○諭本日據崇恩奏報逆匪由豐縣闖入山東單縣  
被圍金鄉魚臺匪蹤徧地是該匪北趨之勢已等燎原不能不先

其所急速籌堵遏所有節次調往徐州之山東官兵一千一百五十名已諭知袁甲三悉數撥回直隸提督史榮椿本應北上卽將此項官兵令其統帶繞出賊前迎頭截擊仍恐兵力不敷復將天津派赴浦口之吉林馬隊二百五十名直隸提標兵二百名一併截留山東見在直隸官兵陸續可入東境如吉林馬隊已經出境卽著崇恩飛飭截回統交該撫調遣俟史榮椿到後卽併歸該提督統帶以資攻剿又諭慶祺挑選直隸精兵一千名交田在田管帶馳往東省協勦該總兵籍隸曹州曾在本省剿匪當可得力該撫見已出閩著卽親往督勦總宜向南迎擊萬不可成尾追之勢驅令北趨其毗連河南之考城等處並著飛咨瑛榮派兵堵擊能將該逆截回徐州然後徐圖掃蕩方於北路大局不至有礙至元城土匪聚眾劫官已諭慶祺飭屬嚴拏並著崇恩飭知交界各屬

一體兜捕蘭山餘匪亦著迅速搜剿淨盡以免勾結爲患其截留  
調往浦口官兵內有備用餘馬二百五十五匹著該撫派員先解  
往德興阿軍營俟山東勦辦事竣再將截留官兵飭令前往可也  
將此由六百里諭令知之○諭本日據崇恩奏皖逆竄擾東境請  
將節次調往徐州之山東官兵撤回一摺徐州節次調去山東官  
兵一千一百五十名係屬赴援鄰境以勦爲防今該匪闖入東境  
亟應移緩就急以遏其北犯之勢著袁甲三迅將前項官兵卽交  
史榮椿管帶啟程馳往東省繞出賊前迎頭截擊不可成尾追之  
勢驅賊北來袁甲三見已馳赴北路布置或分兵擾出賊前遏其  
北犯或派令傅振邦等速克豐縣擣其巢穴總須通籌緩急相機  
辦理毋得專顧徐州一隅貽誤大局見在袁甲三須防北路卽可  
將懷鳳勦匪事宜暫交徐廣縉辦理並與勝保籌商一切也將此

由六百里諭令知之○賞已革兩廣總督徐廣縉四品卿銜隨同太僕寺卿袁甲三辦理安徽勦匪事宜○調英桂爲山西巡撫恆福爲河南巡撫○癸亥諭內閣翁同書奏皖北籌餉惟難請分撥皖南州縣錢糧等語見在皖北餉需緊要著准其將廣德州並建平縣地漕正雜款項儘數解歸皖北以資接濟其甯池徽太四府地漕仍照舊歸皖南軍營動用○諭翁同書奏舉行團練請旨鼓勵一摺安徽省被賊竄擾爲日已久受禍最深總由地方官不能實力舉行團練所致茲據該撫奏稱委員督辦壽州定遠合肥等屬團練旬日之間遠近響應廬州和州竊據之賊累出焚掠多被練勇擊回其由界牌竄至藕塘池河地方者亦畏民團協力守護未敢進逼定遠縣城並據各鄉團練與賊接仗斬獲長髮首級及八擒賊黨奪獲烏槍旗幟器械解送軍營者不少實屬深明大義

踊躍同仇殊堪嘉尚著翁同書認真督率協同官軍出力堵剿所有該地方官委員董事以及練總人等如果始終奮勉殺賊立功准由該撫擇尤保奏候朕施恩以示鼓勵○諭軍機大臣等前因山東單縣被圍緊急諭令僧格林沁等將前次調赴江北官兵截畱交山東省調遣本日據崇恩奏疊次剿匪獲勝單縣業已解圍又據德興阿奏近有皖逆數萬撲及江浦勢甚危急等語所有吉林馬隊及直隸提標官兵著毋庸截畱山東仍著飛咨飭令迅赴德興阿軍營以資攻剿至前諭慶祺托明阿於直隸各鎮協內挑選官兵一千名或千餘名前赴山東之處見在已可無需著於挑選後卽令在本汛聽候備調毋庸卽赴山東並著飭知田在田仍遵前旨來京陛見將此由五百里諭令知之○諭德興阿奏皖逆撲及浦營後路危急情形一摺水師偏攻九洑洲賊壘續獲勝仗

乃滁州之賊占踞三界竄至來安李秀城陳玉城各賊全股東犯  
粵捻句結眾各數萬珠龍橋失守該逆由烏衣直撲浦口占踞東  
西葛地方賊勢猖獗鞠殿華督兵深入身受矛傷朕心殊爲繫念  
亟宜整頓各軍嚴密堵截該大臣見調安勇由石磧橋帶官兵二  
千餘名回守小店尙恐兵力不敷和春所撥援兵計已被江賊黨  
雖多其中裹脅不少如能連挫兇鋒其勢亦易解散一面督水師  
認真防剿毋令水口之賊竄伺東路至李兆受投誠尙難深信該  
大臣俟江南援兵到日仍可分兵扼守來安防賊詭計是爲至要  
將此由六百里諭令知之○諭崇恩奏勦匪獲勝單縣解圍一摺  
此次賊匪圍撲單縣該地方文武率同團練以少勝多立解城圍  
其竄擾金鄉魚臺各匪亦經兵勇民團擊退東境軍情稍鬆所有  
直隸調兵赴援之處業經諭令停止其由天津派往浦口之吉林

兵及直隸提標馬隊兵丁亦著崇恩毋庸截留卽飭迅赴德興阿軍營可也見在大股賊黨尙在豐沛一帶崇恩前調本省各兵仍應派往防守俟徐州調回官兵入境後方可將他處調兵酌撤此次單縣等處勦退賊匪鄉團之力居多著該撫先行擇尤保奏以資鼓勵黃良楷素得民心著留於單縣金鄉一帶督率鄉團隨時防勦毋稍疏懈至徐州調回各兵入境後仍當以勦爲防賊至則出境邀擊以遏其北趨之勢不可株守邊界置之無用之地將此由五百里諭令知之○予安徽殉難知州王應奎祭葬世職○乙丑諭軍機大臣等袁甲三奏收復豐縣追勦餘賊並請飭東豫各撫嚴防邊界等語豐縣雖已收復賊匪仍竄曹單一帶前據崇恩奏單縣解圍本日又據瑛榮奏探聞曹縣於十五日失守逆蹤西竄豫境睢蘭考虞等處情形喫緊山東河南毗連江皖處所均須

擇要設防已論崇恩親自出省督飭地方文武堵剿並諭瑛棨加  
意防範矣所有徐州節次調去山東兵一千一百五十名仍著袁  
甲三交史榮椿管帶馳赴東省助剿袁甲三見擬將北路趕緊布  
置卽親督諸軍併力南剿雖有未遑兼顧之勢其西北一路勢太  
空虛仍須與傅振邦妥籌督辦以期面面扼截不至竄越肆擾其  
毗連豫境之區見有博崇武等跟蹤追擊惟河南兵力甚單著飭  
令聯絡鄉勇悉力截剿勿令再向北竄將此由六百里諭令知之  
○諭本日據瑛棨奏探聞山東曹縣已於本月十五日失守賊勢  
甚屬狡猾如果確實東省仍形喫緊崇恩應卽帶兵出境攻剿並  
嚴飭各路防兵認真追擊遏賊北趨斷不可株守本境稍形疏懈  
其徐州調回之山東官兵一千一百五十名入境後卽可會同本  
地兵團將曹單一帶賊捻悉數殲除毋令蔓延至吉林等馬隊本

日又據德興阿奏催該撫仍當遵照前旨飭令迅赴浦口軍營可也將此由六百里諭令知之○諭瑛榮奏存營額兵無多請留省堵剿等語逆捻竄擾曹單意圖西竄豫境開歸兩屬逼近賊氛堵剿喫緊存營額兵無多再難抽調自係實在情形所有前諭調赴勝保軍營之陝西兵四百名營總蘇克金所帶馬隊二百餘名均准其留於本省堵剿毋庸調出至所請飭令總兵楊昌泗赴豫調遣本日已諭知曾望顏卽飭該總兵帶兵馳往河南交瑛榮調遣此項官兵到後該署撫卽可分撥布置以遏逆氛並可酌量將勝保前調兵丁發往以資攻剿將此由六百里諭令知之○諭瑛榮奏防剿需人請飭調帶兵大員等語見在逆捻竄近豫疆該省帶兵鎮將不敷分布著曾望顏卽飭延綏鎮總兵楊昌泗酌帶兵一千名或數百名並備軍械糧餉馳往河南交瑛榮調遣該撫務須

飭令該總兵挑選得力官兵趨程前進毋稍遲誤將此由六百里諭令知之○明善段承實奏行抵常州籌議辦理情形 上命將全免稅課一層明白宣示使洋人知中國待以寬大之恩此後獲利無窮無須再赴天津伸訴冤抑所許各項自可全行罷議爲一勞永逸之計○德興阿奏皖賊前赴江浦各口眾逾數萬臣飭安勇等晝夜嚴防並派副將銜馬國升等聯絡聲勢合力痛剿由汜河等處過河博奇等馬步隊分投截擊賊大敗潰復經張家渡一帶民團前來助戰聲勢愈增追殺一千餘名餘賊淹斃無數和春已派遊擊馮子材帶兵過江卽派同博奇等聯紮數營於安定橋等處另派英貴駐紮陡岡以顧浦營北路賊若全潰卽令馮子材移紮大營集以顧六合見據富明阿等報六合稍鬆然浦口江浦賊已分撲而來難保不由高唐集再犯東路所有六合及施官雷

官大營來安文武兵勇全責成富明阿溫紹原二員調遣再咨商和春等添撥精兵二千布置江北以臻嚴密報聞○予江蘇殉難教諭高青選祭葬世職○丙寅諭軍機大臣等昨因瑛榮奏探聞山東曹縣有失守之信諭令崇恩出省督勦本日據該撫奏賊擾武城旋即收復曹縣被陷擬調青州馬隊親赴督辦等語曹縣本有兵勇設防何以遽被賊匪竄入河沿邊境既有團練十餘萬扼截河干必得東省兵力趕往兜勦方可迅殄逆氛杜其北犯昨諭崇恩仍飭黃良楷在單縣金鄉等處督率鄉團防堵該撫未到之先能否將曹縣竄匪即時撲滅見在崇恩既帶馬隊出省著先就見有兵力率屬堵勦一面飛催史榮椿所帶徐州調回官兵迅速赴援入境後會同勦辦毋令久踞縣城致滋蔓延至賊蹤已入東境與前在豐縣情形不同此時袁甲三自應派兵追勦至山東地

界未必再調曹兗等處官兵出境儻賊匪盡行回竄東境已可無虞彼時袁甲三欲調防兵就近協勦仍須聽其札調不得區別畛域坐誤事機將此由六百里諭令知之○戊辰諭內閣曾國藩等奏湖口九江建立祠宇請飭地方官春秋致祭一摺著照所請所有江西湖口石鐘山上建立水師昭忠祠九江府城建立塔齊布祠見在將次工竣卽著各該地方官照各府昭忠祠之例春秋致祭以褒忠節○諭曾國藩等奏捐建忠義總祠請飭地方官致祭一摺湖南省自咸豐二年長沙解圍後經侍郎曾國藩等督率湘勇先後勦賊數年以來死事官紳忠節昭著見經該侍郎等於湘鄉地方捐貲倡建忠義總祠著准其照各府昭忠祠之例由地方官春秋致祭至已故布政使銜浙江甯紹台道羅澤南贈布政使銜記名道員王鑫補用直隸州知州劉騰鴻前經降旨分別建立

專祠著於本縣各建一祠以昭忠蓋○諭軍機大臣等勝保奏新調馬隊請分撥協剿等語該大臣見擬將懷鳳一帶布置停妥即行督兵南下自爲南北兼顧惟因察哈爾馬隊爲袁甲三奏請截留另片縷陳力言捻逆情形南重於北未免猶存意見該大臣既統全皖軍務應如何分撥兵勇不妨徑行派撥卽袁甲三有全數截留之奏亦可酌度緩急和衷商調況捻匪大股已越徐州而北擾及山東袁甲三所稱北路喫緊亦未可厚非該大臣旣擬將此項馬隊以二百名暫留淮北以三百名調赴南路卽著照所請分撥此外馬步各軍應如何布置總宜與袁甲三商榷分別緩急酌量調撥爲要至廬州大股賊匪昨據德興阿奏已陸續東犯其由梁園等處竄出來安江浦者不下數萬則廬城賊眾必已空虛勝保亟宜統兵前進掩其不備若能速克廬州亦足牽制南路之賊

不使四出北犯袁甲三未能卽赴臨鳳定遠以北誠不免空虛該大臣見已畱兵該處並奏令徐廣縉暫行督率俟徐境賊勢稍鬆袁甲三仍當回顧淮南該大臣布置妥協卽當迅速南征毋再遲延李兆受所遞各件有乞賞銀一萬兩之語未知勝保能否應其所求設或不能有無反覆此時仍應飭令來安等處嚴防並催李兆受迅速舉事果能著有成效方可自明心迹該大臣亦不至因此久稽進勦也將此由六百里諭令知之○諭前因單縣解圍諭令慶祺將前備調官兵飭令在本省候調並因元城縣匪徒滋事諭令慶祺速爲查辦本日據崇恩奏曹縣業已克復匪蹤四散所調直隸官兵無須前往或令屯紮元城等語元城縣匪徒趙金聲抗糧滋事劫去知縣該督諒已遵照前旨迅速查辦儻該匪趙金聲尙未就獲該縣知縣尙無下落匪徒等實有聚眾謀叛情形自

應速籌殲滅著慶祺卽將前飭候調之兵派往元城相機勦辦無任日久蔓延如匪首業已就擒無須用兵該督卽飭前調官兵仍在本汛候調毋庸前赴元城將此諭令知之○諭崇恩奏官軍克復曹縣賊勢渙散旋卽親往督勦一摺曹縣賊匪因官軍四集被殲甚眾突從南門竄出該縣城池雖已收復而匪蹤四散分擾堪虞崇恩卽日帶兵往勦所有由徐州調回之山東兵諒史榮椿計日亦可帶到該省民團可用無須客兵該撫卽飭黃良楷等督同地方員弁分投追勦務須迅掃賊氛勿令北竄至所稱土匪四起亦甚可慮地方官若能妥爲駕馭原可化莠爲良並著密飭各屬一面嚴查奸宄戢暴安良一面責成團總將失業之徒招爲團練責令協同守禦俾就鈐束庶不至爲賊匪勾結又添黨與也將此由六百里諭令知之○勝保奏粵逆自池河敗遁後裹脅十餘萬

賊馬一二千匹竄至滁州因滁城閉門不納向東竄去意欲攻撲江浦六合逆首陳玉城偏令李世忠分攻來安李世忠進至水口地方佯爲攻取稟請大營諭知來安以免驚擾臣卽飛咨江北軍營早爲防範以免該逆奪路過江得爲金陵因賊援應臣在定遠部署稍就卽折回馬頭城大營連日挑選兵勇帶同南下其餘仍畱鳳懷交徐廣縉督率進攻惟逐北追奔必資馬隊穆騰阿所帶已全赴定遠廬營存馬已屬不敷鳳懷一帶亦不能不酌畱馬隊臣前請調察哈爾官兵已飛往迎提並飭李孟羣收集兵勇於壽州六安一帶扼要駐紮聽候調遣廬營潰後頗難振作已嚴飭鎮將大加選汰仍待臣親往整頓擬俟鳳懷攻勦事宜部署停妥臣卽統帶兵勇馳會撫臣翁同書商定機宜迅圖進取報聞○曾國藩奏見擾閩境賊匪探係僞易王石達開屯踞崇安之星村黎

源等處及建邵各屬又據擒賊供稱僞國宗楊輔青與石逆共帶賊黨十餘萬楊逆先踞浦城石逆自衢處敗竄入閩窺犯延建等郡本年正月內楊石二逆互相仇殺楊逆遂棄浦城出犯廣豐玉山分道而馳石逆尙有七八萬眾盤踞閩省各屬總兵周天受等已抵浦城臣於八月初八日行抵河口鎮張運蘭蕭啟江吳國佐朱品隆等軍均已到齊伏查賊渠以石逆爲最悍臣卽日親督兵勇由鉛山入分水關直擣崇安由崇安而東北可趨廣豐玉山一路由崇安而南約有三路東出延平西至建甯中達汀州見署督臣慶端駐紮延平東路當可無虞西路各境有道員劉長佑扼隘駐紮賊情萬變其或北歸皖省南返廣東老巢目前未能遽測臣俟抵崇安後探確賊蹤再行分別進剿報聞○撥山西汾陽縣倉穀三千石運赴平遙縣備賑○己巳諭內閣瑞常等奏遵旨查

明鄉關辦理不善各情請分別審訊議處一摺此案順天府大興宛平二縣辦理鄉關供給任意草率既據查明有發價折扣情事猶復供詞歧異顯有需索抑勒情弊所有該二縣經手家丁吏役著交刑部查傳嚴行審訊大興縣知縣賀廷鑾宛平縣知縣毛慶麟應得處分俟刑部訊明後照例覈辦糧馬通判蕭鼎禧既有胞弟應試例應回避乃託病告假不肯入場實屬取巧規避著先行交部議處其有無營私肥己等弊著俟刑部訊明後照例辦理委員李光瀾李建中催辦遲延試用府經歷潘瀄臨期不到治中繹大鏞辦理卷冊錯亂均著交部議處委員蕭履中等著吏部查取職名一併議處順天府府尹蔣同新身任監臨總司場務於派委各員既不能詳慎於先以致疲玩草率種種延誤甚至於規避不到之員均未指名參辦尤屬有心徇庇梁同新著照吏部原議降

三級調用以示懲儆○大學士桂良等奏行抵常州會商大概情形存旨卿等陛辭時朕諭卿等爲一勞永逸之計况抵償兵費一節全括於免稅之中此時入手卽作此下策何其見不能定心總易搖朕殊爲過慮恐一涓未息一涓又興後此作何了局惟望卿等斷不可於初定辦法之外另籌省事之法破除情面勿恤人言方不至自干咎戾無裨大局○予浙江殉難教諭汪世鍾江西陣亡府經歷張翔等祭葬世職○庚午諭軍機大臣等前據德興阿奏報皖逆大股撲犯浦口冀援金陵本日據和春奏浦口大營已於本月二十日失守德興阿扶病督兵衝出重圍退保六合等語金陵圍剿功在垂成逆援踵至堵禦爲難此時浦口一失局勢又恐中變究竟員弁兵勇損失若干德興阿先赴六合能否整頓軍威力圖控扼和春先後派出之官兵五千名已陸續渡江自應合

力會勦務使六合以東不至再有疏失方可徐圖恢復本日復諭知胡興仁將江南援浙之兵酌量調回以便赴援江北和春亦得布置以固金陵並著德興阿收集潰兵力籌堵勦仍飭沿江水師截住洲賊勿使勾連陸路此時賊勢猖獗非得勁旅相援難期得力已諭知官文於楊載福李續賓水陸各軍中酌量令其分道東下進攻以牽賊勢至金陵一日不克各路援賊亦有日多之勢和春等早稱功在垂成仍蹉跎至此不獨銳氣漸消卽餉精亦屬不繼著和春張國樑激勵將士迅克金陵卽少有竄逸亦不難分路勦辦終勝頓兵城下坐令逆黨生心也將此由六百里各諭令知之○諭本日據和春奏滁全大股賊眾攻撲江浦浦口六合圍援金陵浦口各營全被焚毀德興阿退至謝家店扼守六合並據稱蕪太賊壘日增揚言卽日內犯東壩高淳以解金陵之圍閩省回

竄之賊已由德興婺源將入甯太歸併金陵舒桐廬巢各路下竄之賊復不可勝計賊勢甚爲猖獗金陵正當圍攻喫緊之時設有疏虞所關非細自非有生力勁軍難資堵截著官文酌量情形卽將李續賓分出之兵會同楊載福師船攻勦廬州安慶直達蕪湖等處以牽賊勢使逆眾不敢東竄實於江南北兩營均屬有益至都興阿一軍尙在宿松其能否分撥赴援之處並著官文酌量調度將此由六百里諭令知之○諭和春奏浦口官軍失利已飛咨胡興仁調回援浙之師徑赴六合並探聞閩省回竄之賊已直至東流建德將越徽池以入甯太各等語江北大股賊匪直撲東路德興阿等迎擊不利以致浦口失守和春已由江南軍營撥兵五千往援江北而閩省竄匪復將由甯太以援金陵賊勢披猖兵力不敷於大局均有關繫見在浙江防務稍鬆所有江南援浙各軍

著胡興仁酌量情形卽行飭回令赴六合以資援剿至浙省防務未容稍懈仍著該撫會商李定太實力堵剿不得稍存玩視將此由六百里諭令知之○諭袁甲三奏擒匪被剿回竄老巢見擬移營南剿一摺據稱該逆自單曹敗竄繞道歸德奔回蒙亳老巢惟北路匪蹤是否淨盡山東境內有無餘孽袁甲三旣令傅振邦進紮濰溪並回駐宿南兼顧南北著卽認真追剿總期就地掃除勿使再有延蔓至所請添兵添將以期迅速掃除自係實在情形惟見在滁廬大股逆匪分竄東路浦口大營已於二十日失陷和春營中已撥兵五千名渡江赴援是江南江北兵力均形支絀一時斷難抽撥俟江北大勢稍鬆金陵兵力充足再行酌量分撥此時袁甲三應迅赴淮南力擣首逆巢穴能將懷鳳各城克復則勝保畱於該處之兵卽可就近商撥爲北路之用方是正辦湖北官軍

前雖有旨令其酌分數千繞赴北路尙未據官文覆奏見在沿江一帶攻勦正關緊要能否前來尙未可定若各路軍營抽撥馬隊則尤勢所不能緩遠城馬隊前已允勝保所請以二百畱於徐營以三百隨該大臣南下仍著遵照分撥其請調郝上庠並仍畱山東官兵亦經諭令崇恩酌量如東境實已肅清自可照議辦理勝保軍營需兵亦甚緊急山東邊境防堵亦未可稍疏如有應畱應調之處總應與勝保崇恩互相商榷以期彼此有益未可各出己見徒滋爭執無益事機歸德各屬團練旣據聲稱截勦得力著准其擇尤彙保以示鼓勵將此由六百里諭令知之○諭本日據袁甲三奏捻回老巢東省防務已鬆請畱赴徐官兵並暫令郝上庠前往差遣各等語見在捻眾均已南趨仍回老巢袁甲三亦回駐宿營力籌南勦是東省軍情已鬆所有徐州前調山東官兵一千

一百五十名據奏除傷亡外迭次逃散四五百名尙未收集著崇恩酌量情形如果東省已無賊蹤卽將此項官兵仍畱徐州軍營調遣至副將郝上庠袁甲三因帶兵見乏大員仍請旨飭調能否派往之處並著崇恩酌量辦理將此由五百里諭令知之○諭瑛榮奏擒匪被擊回竄見飭官軍追剿一招曹單等處竄匪意圖西竄豫疆疊經考城商邱甯陵虞城各文武督率兵勇堵剿獲勝該匪已向東南竄去惟此股賊匪人數眾多由徐境竄擾東豫雖均卽時擊退而該匪等並未大受懲創亟應四面攻圍以免紛竄所有營總蘇克金等各軍據瑛榮奏稱已飭跟蹤追剿著卽嚴飭該營總等統帶兵勇迅速前進務與袁甲三及山東省所派各軍實力圍剿盡殲醜類不得以賊匪業已出境徒事株守致滋貽誤將此由六百里諭令知之○辛未諭內閣前因湖北巡撫胡林翼丁

伊母憂當降旨令其穿孝百日後仍署巡撫俟軍務完竣補行守制茲據胡林翼奏扶柩回籍懇請終制並官文奏屆期仍令署理巡撫印務各一摺見在楚境雖已肅清而逆氛未靖大軍水陸東下運籌機宜儲備糧餉以及地方善後邊防各事宜均關緊要胡林翼熟習情形實心任事當此時勢多艱正臣子力圖報效之日未可拘泥恆情致誤事機胡林翼著仍遵前旨於假滿後署理湖北巡撫印務軍務完竣准其補行終制以遂其孝思○耆齡奏江西官軍自克復瑞臨撫建各府城後惟吉安賊匪仍復負隅抗拒七月二十一日曾國荃等水陸各軍四面環攻城內之賊屢次出撲並放木簞下衝均經各軍隨時擊退八月初十日趙煥聯等會攻北門礮斃騎馬賊目七名餘匪遁回遮克敦布自水東進攻南街亦多斬獲是夜賊用大簞六架後繫小划數十號乘急流衝

下曾國荃遮克敦布等各戰船併力迎擊將賊隊小划小棹在浮橋內擊奪淨盡並擊散大棹一架斃賊無數餘大棹五架衝斷鐵練浮橋下遁定湘等營水陸跟追先後在三曲灘將大棹焚奪無遺登岸之賊概爲陸勇殲滅計擊斃溺斃之賊數千十一日各營蹋毀白鷺洲及城外賊壘多座十五夜即將吉安府城克復江省全境一律蕩平已飭派水陸各軍追捕逃匪悉數殲除毋畱餘孽 上諭耆齡奏克復吉安府城大概情形一摺吉安被陷已久此次耆齡督飭各路兵勇迅卽奏功辦理尙爲得手竄逃餘匪仍著四面追剿毋令再有蔓延出力員弁並著擇尤酌保候朕施恩○諭軍機大臣等前因明善等奏全免稅課一節當諭令桂良花沙納何桂清等仍遵原議辦理昨據桂良等會同何桂清奏會商大概情形復詳細批示諒該大臣等接奉後必能遵照辦理不至

固執已見本日何桂清奏稱利柄必應收回稅則不可輕免等語  
在該督身任地方爲國家惜此帑金然所籌究爲目前起見並非  
一勞永逸之計前寄諭旨及硃批已極詳盡無可再諭何桂清受  
朕厚恩斷不至別有他意特恐屬員慮及免稅無可沾潤因而設  
詞淆惑亦事所有該督當力持定見勿恤人言至於地方情形或  
有窒礙曾諭令稍爲變通亦須將窒礙之處詳細陳明不可自出  
己見致防大局將此由六百里諭令知之○諭慶端奏建郡堵勦  
情形並請飭曾國藩由河口入閩等語曾國藩奉命督兵援閩昨  
已據奏於八月初八日行抵河口擬由鉛山入分水關直搗崇安  
諒能確探賊蹤相機截擊見在松溪政和縣境肅清竄匪併浦城之  
匪亦經周天培等進攻得手收復城池惟浦崇竄匪見撲建郡情  
形甚爲猖獗該省兵力不敷恃有由浙調援之師得顧北路若曾

國藩所統勁旅由崇安入閩扼勦會合閩浙兩省兵勇當可四面聚殲著該侍郎迅速前往督飭張運蘭各軍埽蕩逆氛毋稍延誤其沙關等處隘口亦卽飛咨耆齡令該省將備杜其回竄之路以臻周妥將此由六百里諭令知之○辦理江北糧臺江甯布政使楊能格奏浦營退守六合揚州情形危急咨會總兵官毛三元扼守要隘得旨觀汝咨會毛三元嚴截兵勇想汝此時必以護餉爲詞出城登舟何膽怯若是大員尙如此慌張無怪乎居民紛徙保護軍械糧餉豈無委員可派六合後路汝應幫同駐守將官協力防堵勿得稍存膜視○壬申諭內閣何桂清等奏請將閩稅暫增額外盈餘銀兩儘收儘解一摺前經何桂清等奏江海關稅每年於正額盈餘外約可加增額外盈餘銀十二萬兩撥充軍餉不作永遠定額茲據奏稱此項額外盈餘自七年六月起至本年五月

底止一年期滿共收銀十萬餘兩覈與奏明約定數目計有短絀  
委因地方用兵貨乏來源路多阻滯尙非稽徵不力此項額外盈  
餘銀兩著准其儘收儘解以昭覈實○諭軍機大臣等據德興阿  
奏浦營軍潰自請從重治罪並鞠殿華奏督兵大臣病勢沉重一  
摺披閱實深焦灼浦口旣已失利悍賊全趨北岸六合以東萬分  
危急速宜收拾潰兵先扼六合力保儀揚再圖收復浦口城池支  
撐大局馮子材等赴援之軍皆屬精銳和春又添兵二千名過江  
協勦著德興阿等妥爲調度復振軍聲此時德興阿病勢頗重深  
恐精力不支著鞠殿華善爲保護並著德興阿商酌在該營鎮將  
中擇其謀勇兼長堪勝幫辦者奏保一員候旨簡派如德興阿病  
情沈重精神昏亂卽著鞠殿華遴員保奏至江浦孤城是否尙能  
固守浦口潰散各員如何下落傷亡弁兵若干著一併查明具奏

將此由六百里加緊諭令知之○以浦口軍營失利拔德興阿花翎與鞠殿華均革職畱任○是月免江蘇橫浦等六場竈地舊欠額賦並蠲七年十分之一